

太宗皇帝實錄

太宗皇帝實錄卷第四十二

起雍熙四年九月  
盡十二月

九月辛酉朔澶州進嘉禾御製嘉禾合穗五七言詩  
二首賜宰相李昉等壬戌賜殿前承旨徐半千同進  
士出身仍賜綠袍及錢十萬以其上章言時政也癸  
亥以文思使薛繼昭領巒州刺史知江陵府以右拾  
遺任仲華直史館乙丑御製五七言六韻菊詩各一  
首賜近臣丙寅駕幸金明池觀魚召從臣垂釣因  
登水心殿習射上中的者五張樂宴飲極懽而罷  
以監察御史趙昂爲右拾遺直史館以同進士出身

徐半千賜名巖叟仍授陳州司戶參軍丁卯以右補闕直史館胡旦爲戶部員外郎充修撰己巳右千牛衛上將軍李從善卒從善字子師江南國主景之次子煜之弟也僞封萬安郡公累遷至兵部尚書紀國公周顯德中景遣從善入貢對見之際世宗器之使還會景還豫章命督諸軍事封鄧王煜立尊奉朝廷制度多所貶損降封楚國公開寶四年復遣入貢時太祖有平吳之志因留不遣制授兗州刺史泰寧軍節度使江南平改右神武大將軍上即位遷右衛

大將軍改右千牛衛上將軍出爲通許監軍至是卒  
年五十輟視朝一日辛未以虞部貢外郎李度直史  
館翰林學士蘇易簡進 軋明節內道場步虛詞二  
十章 上覽而嘉之依韻屬和以賜易簡壬申以戶  
部貢外郎直史館石熙古爲尚食使癸酉以善醫司  
徒正等二十一人並充翰林醫學先是詔諸郡訪醫  
工之良者送闕下令太醫署校其業術優長者得正  
等故錄焉丁丑以起居舍人田錫守本官知制誥錫  
進 軋明節祝壽詩 上覽之深所稱賞因和以賜

之故有是命庚辰以屯田員外郎崔策爲福建路轉運使國子博士范正辭爲江南轉運副使以著作郎王綸直史館辛巳以主客員外郎知制誥宋準爲金部員外郎罷制誥之職病故也詔曰王者上事穹蒼下臨黎獻遵執古御今之道推子民育物之心必務嗇以勸農庶家給而人足朕嗣守大寶惟懷永圖發一言必念生靈嘗一膳先思稼穡雖燔柴告類紫壇屢薦於至誠而執耒親耕青輅未行於盛禮斯本之道不其闕歟三推宜舉於舊章百代永垂於信史其

以來年正月擇日有事於東郊行耜田之禮宜令所  
司詳定儀注以聞無至勞煩務遵典故是禮廢之久  
矣制下之日中外歡洽以翰林學士宋白賈黃中蘇  
易簡同詳定耜田儀注已丑詔以滑州黎陽縣隸澶州  
冬十月庚寅朔以中書舍人王祐爲兵部侍郎祐久  
在病告上以其舊德優之也壬臣召親王近臣射  
於後園上中的者五以左諫議大夫郭贇爲鹽鐵  
使丙申 軋明節羣臣上壽己亥賜宰相及近臣御  
製苑中見羣鶴飛七言詩一首令屬和壬寅詔曰江

南道錄問刑獄覆視災傷本處請官或多推避自今並須承牒即往從本道轉運使范正辭所奏也癸卯太白犯進賢星甲辰下元節京城張燈是日宴中書門下翰林學士文武常參官節度觀察防禦團練使刺史諸軍校百夫長已上諸州進奉使外國蕃客於大明殿乙巳詔宰相李昉召樞密使王顯等於私第宴飲仍降中使賜羊酒丙午詔曰右驍衛上將軍劉廷諱位居上將任處邊城兼資統帥之權制彼寇戎之境而乃擅離治所輒赴京都不畏憲章頗孤委寄

有司議罪當在極刑特行寬貸之恩止降削除之命  
所宜自省知此優恩宜除削在身官爵送商州安置  
廷諱本幽州人唐盧龍軍節度使仁恭之曾孫也祖  
守文襲滄州盧彥威遂據其城邀節鉞於昭宗因與  
之後弟守光因其父仁恭於幽州別室守文因舉兵  
討之軍敗爲守光所殺廷諱與其父延進南遷焉廷  
諱始與上同名故改之少有勇力周祖節制魏博  
以中涓從周有天下擢爲內殿直押班累遷龍捷都  
指揮使從世宗征淮南以功領雷州刺史尋遷鐵騎



右廂都指揮使顧涪州團練使國初改龍捷右廂都  
指揮使顧江州防禦使李筠叛上黨以廷諱爲行營  
先鋒使澤潞平以功授平江軍節度使侍衛馬軍都  
指揮使軋德中討西蜀以廷諱爲陝西路行營都部  
署蜀平王全斌崔彥進皆坐縱部下掠人女子玉帛  
左授唯廷諱所至秋毫不犯以功授陳州刺史鎮安  
軍節度使從征太原改澶州刺史鎮寧軍節度使  
上即位加檢校太尉改右驍衛上將軍雍熙三年曹  
彬敗於歧溝關復詔廷諱爲瀛州兵馬都部署及君

子館之敗詣闕請罪 上知爲李繼隆所誤不之責  
四年復爲雄州兵馬部署未幾以疾聞不待報擅離  
治所 上怒下御史按其罪故有是命因怏怏不食  
數日行至華州卒年五十九 上錄其舊勲詔贈太  
師壬子左僕射致仕沈倫薨倫字順宜陳留太康人  
名上一字與 上舊名下一字同倫頗精戴禮常於  
嵩洛間以教授自給漢乾祐中白文珂鎮陝召致門  
下周世宗即位 太祖節制同州宣徽使皆居潤嘗  
與倫厚善乃薦倫於 太祖 太祖辟在幕府後遷

滑許宋三鎮皆爲從事及即位自睢陽召至賜五品服翌日授戶部郎中建隆三年遷給事中賜金紫爲陝西轉運使軋德中蜀平以倫爲計度制置使先是大將王全斌崔彥進等入成都也皆厚招斂民家玉帛子女洎倫至獨居佛寺蔬食而已及受代歸闕篋中唯圖書數卷 太祖廉知之故貶全斌等擢倫爲戶部侍郎樞密副使開寶二年 太祖征太原以倫判留司事六年授中書侍郎同中書門下平章事集賢殿大學士兼判荆南劔南水陸發運等使九年

太祖郊祀西洛復以倫留守 上即位遷右僕射兼  
門下侍郎依前平章事監修國史太平興國四年  
上征太原又以倫爲留守判開封府事河東平進位  
左僕射盧多遜之敗責授工部尚書罷知政事是年  
秋被病請告 上憐之復授左僕射致仕至是薨年  
七十九輟視朝兩日贈侍中追封魯國公謚曰恭惠  
倫純朴謹厚故 車駕每出多以倫爲留守然十年  
相位但齷齪固寵不能有所建明性尤好釋氏雅信  
因果之說常盛夏裸坐室中恣蚊蚋嗜其膚通夕不

寐以徵福人皆笑之倫微時妻老且醜有妾田氏甚  
寵之及貴於太康治居第令故妻處焉遂以田氏爲  
魯國夫人搢紳以此非之翰林學士賈黃中等以所  
集神醫普救方一千卷來上賜詔曰盧扁之方雷桐  
之術佇之以十全之效言之於七日之前古法在焉  
人命所繫朕纂承大寶撫育兆人每念夭傷思伸救  
療而方書舛誤編秩繁多因命分以部居條其類例  
黃中等思窮精詣識本䟽通集彼羣方著成千卷垂  
於後世所利益多克副朕懷深嘉乃績宜加頒賚以

示優恩仍宣付史館令刊板流布天下黃中等賜器幣有差丙辰出益州所進九穗禾牛生三犢圖并六眸龜以視近臣戊午以右贊善大夫程文度爲監察御史荆湖轉運副使詔建廣德軍郎步鎮爲建平縣十一月庚申朔山南東道節度使趙普上表以藉田乞入朝詞甚懇切上憫之謂宰相曰普開國元臣朕所尊禮宜從其意癸亥兵部侍郎王祐卒祐字景叔魏郡人也父徹唐同光初與桑維翰同年登進士第授晉昌軍節度推官拜右拾遺祐少孤篤志詞學

性倜儻而俊急遇事輒發中無所隱泊維翰入相祐以父同年門生裁書自陳維翰竒之禮待甚厚自是文價益重鄴帥杜重威辟爲觀察支使漢初重威叛祐責授遼州司戶參軍周有天下歷魏縣南樂二令召赴闕時楚州有滯獄累遣使不能決命祐鞠之研究其情即時具伏還奏拜監察御史出知光州轉殿中侍御史歸闕遷禮部員外郎知制誥時方平蜀詔命填委祐致思敏速有餘力焉翰林學士陶穀見之深加歎伏遷戶部員外郎集賢殿修撰 太祖親征

并門已濟河召祐謂曰上黨素爲要害之地汝爲吾  
暫往控制之遂知潞州踰年又知大名府太祖謂  
曰此卿之故鄉所謂畫錦者也詔還改知襄州移知  
潭州所至皆理代還以本官知吏部選事及知貢舉  
未幾坐事出爲鎮國軍行軍司馬上即位知河中  
府事徵爲左司員外郎復判大理寺知吏部選事拜  
中書舍人史館修撰受詔撰普照王寺碑經宿上進  
中外驚其神速久之知開封府以病請告拜兵部侍  
郎至是卒年六十四上尤悼念賻贈加等祐之知



制誥盧多遜同列多遜與宰相趙普相傾每諷祐欲與己協共擠普祐不從以爲唐宇文融嘗與張說有隙時說爲融所擯而出及說復入融遂敗祐因以融傳示多遜多遜不悅及多遜參知政事乃出祐華州後終以陰事中普普復入多遜果及禍與宇文融事正同識者以是許祐之先見 上嘗詔於史館集撰神醫普救千卷中官王文壽監視其事權勢甚盛館中學士皆往謁見待之甚厚祐獨不請謁人亦以是多之有集三十卷行於世祐死之日家無餘財搢紳

稱其清儉乙丑以三司開拆推官左拾遺直史館韓國華判開拆司鹽鐵推官段惟一度支推官朱賦戶部推官崔維翰判本部憑由司專主天下錢穀出入之數不更隸本部癸酉以主客員外郎安德裕直史館庚辰詔曰王者設班爵以馭貴差祿秩以養賢所以各懋厥官共成庶務顧其祿食宜在優豐應內外文武臣僚等折支俸錢舊以八分爲十分支給自今並以實價給之癸未日南至上不受朝羣臣詣閣拜表稱賀

十二月庚寅朔詔曰國家設貢舉之任懸俊造之科必在敷求取其藝實使交交東帛盡聘奇才一一吹竽更無濫進眷言考覈宜在精詳委於有司誠爲舊典可依往例命官知貢舉應曾取解舉人限來年三月一日已前到京其未取解者許至秋取解辛卯詔曰宜融柳等三州部內百姓及蠻界人戶等朕纘承皇極臨御萬方覆育之恩惟恐不至矧於遠俗尤所軫懷前知州贊善大夫侯汀委以方州殊無政術不能安集但恣侵陵致此蠻夷肆爲驚擾重煩師旅始

復平寧蓋由綏輯之無方遂使黔黎之被害其侯汀  
已行降黜汝等宜體茲朝旨各務自安悛革前非保  
全舊業苟或不遵撫喻尚敢陸梁當議勦除使無遺  
類壬辰以翰林學士中書舍人宋白右補闕知制誥  
李沆同知貢舉甲午以時雪稍愆分遣宰相及近臣  
偏詣京城諸寺觀祈禱己亥以御製自勉五七言詩  
六首雜言詩一首賜近臣翰林學士知貢舉宋白等  
上言今進士諸科凡八千餘人其間終場落者四百  
九十餘人御前落者六百八十餘人伏請應已曾解

送舉人在千里內委本處重加考試發解千里外者  
兩京發解仍乞誠勵試官務令精覈從之壬寅詔曰  
應兩京及諸道擒獲劫賊獄成遇赦者隸本城軍仍  
廩給之先是江南轉運使許驤上言劫盜遇赦得原  
還本鄉讎告捕者多行殺害請以隸軍故從之甲辰  
上幸建隆觀相國寺祈雪庚戌車駕狩於西郊行  
次近甸命從臣飲謂翰林學士宋白等曰可各賦臘  
辰從獵詩及至行宮白等以詩上至暮還宮親獲雉  
兔五付有司以備宗廟薦饗辛亥以戶部員外郎胡

旦知制誥癸丑詔以常潤二州隸江南道甲寅以左  
驍衛大將軍趙鎔知滄州兼兵馬部署山南東道節  
度使趙普來朝召陞殿慰撫普見上感咽流涕  
上亦爲之動容丁巳大雨雪近臣稱賀

太宗皇帝實錄卷第四十二

書寫人王輔

初對王世昌

覆對訖制

牙

太宗皇帝實錄卷第四十三

起雍熙五年正月  
盡端拱元年二月

雍熙五年春正月己未朔

上不受朝以將有事於

耕藉也羣臣詣閤拜表稱賀庚申御製喜雪五言二十韻詩賜宰相李昉等令屬和癸亥土犯建星甲子成都府言部內比歲不稔穀價翔貴請發公廩賑糴以濟貧民從之乙丑以監察御史宋鐫為右拾遺直史館進賀雪詩稱旨故也丙寅以大理評事王禹偁為右拾遺羅處約為著作郎並直史館戊辰澶州言黃河清二百里癸酉上宿齋於朝元殿甲戌次東



郊是夜宿於齋室乙亥日未明三刻 上親饗神農

氏壇以后稷氏配焉次詣耕藉田位行三推之禮有司板奏禮畢 上顧謂侍臣曰朕志在勸農恨不能終千畝豈止以三推爲限乎遂耕數十步侍臣固請乃止回御丹鳳樓下制曰王者握圖御極膺駿命於上玄務穡勸農利烝民於率土朕嗣臨大寶十有三年每師勤儉之風用洽雍熙之化民惟邦本雖無怠於輯寧食乃民天顧未隆於教道是用舉累朝之墜典藉千畝於近郊載陟青壇躬展事神之禮三推奠

耜式隆斆本之風宣惟備郊廟之樂盛抑亦勵烝黎  
之播殖萬國駿奔而述職千官星拱以在庭望宮闕  
城社之尊睹聲明文物之盛宣予寡昧獨荷於鴻休  
思與華夷同均於大慶宜革紀年之號仍覃作解之  
恩可大赦天下改雍熙五年爲端拱元年自正月十  
七日昧爽已前應天下罪人除犯十惡及官典犯正  
枉法贓至殺人者不赦外其餘罪無輕重咸赦除之  
內外馬步軍諸將卒等第加賞給文武臣僚並與加  
恩諸貶降官未量移者與量移已量移者與復資已

復資者與叙用除名免官人等所司具名以聞天下  
人戶雍熙三年已前條欠夏秋稅物並與除放應軍  
民爲盜亡命山澤百日不來陳首復罪如初民有年  
七十已上見爲家長耆年宿德爲鄉里所宗者宜令  
本州具名以聞當賜爵一級舊制天子孟春吉亥饗  
先農於東郊親耕藉田自東晉南遷此禮廢墜唐貞  
觀中太宗始藉於千畝至元和五年憲宗以河朔師  
旅之後物力凋耗將行而復止自是歷五代二百餘  
祀不復舉行 上以承平旣久乃詔有司參酌典故

行三推之禮所以示勸農而興墜典也丙子 上賦東  
郊藉田五七言詩各一首賜侍臣丁丑詔改晉州洪崖  
廟為棲真觀從本州之請也庚辰詔郡國不得以司  
理參軍兼莅他職先是成都府言以司理參軍承府縣  
之嗣故降詔以止之辛巳右屯衛上將軍伊審徵卒審  
徵太原人同光中父延瓌隨孟知祥入蜀知祥僭即  
僞位以女妻延瓌歷嘉眉二州刺史審徵以父歷任  
僞蜀州刺史通秦使同平章事武泰寧江兩軍節度  
使蜀平歸朝為邠州刺史靜難軍節度使移鎮延安

開寶末徵為右屯衛上將軍至是卒年七十五先是  
審徵與王昭遠俱為偽通奏使掌機務即樞密使之  
任也孟昶國事無大小一以咨之常自以康濟經略  
為己任會王師入境審徵首奉降表詣軍前昭遠時  
統精卒數萬出城拒戰聞王師之至棄軍走匿東川  
城倉中後數日擒獲時人笑之壬午南康軍判官朱  
覃棄市覃淮西人也幼寒賤始為人廝役及長竊  
弄筆硯冒為士流游科場凡數年止以利口持人長  
短士君子頗患之洎策名從政其志益橫與大理評

事王悅素不協悅掌建昌縣酒榷告軍部內為姦賊  
鞠得實故抵於法殿中侍御史龔穎編歷代年紀為  
二圖來上優詔褒之癸未 上幸玉津園習射張樂  
賜從官宴飲乙酉詔曰典獄之官理資於欽恤經國  
之道政尚於寬仁庶洽時雍用期刑措如聞酷吏頗  
恣兇威慮致陷於平人必有傷於和氣宜行禁止以  
示哀矜應天下刑獄罪人內有合行訊問者只得一  
依律令其鼠彈箠非理殘忍之類並禁之先是諸處  
獄吏撈掠罪人以繩接縛其手系於足指用挺叩其

繩則痛入骨髓謂之鼠彈箏 上聞頗悼其酷故下  
詔禁之

二月辛卯詔輟視朝以皇舅靜江軍節度使杜審進  
夫人張氏卒故也癸巳以殿中侍御史柴成務爲戶  
部員外郎直史館甲午宴中書門下文武常參官翰  
林學士節度觀察防禦團練使刺史諸軍校百夫長  
已上諸州進奉使外國蕃客於大明殿乙未詔曰補  
闕拾遺位居諫省榮踐清華之列是爲獻納之臣朝  
廷之得失須論刑政之煩苛必舉曠茲職業寄任非

輕上則輔佐大臣次則公卿庶尹歷朝選任何莫由  
斯苟或但務因循止思慎默忠言讜議寂寥無聞殊  
乖申諷之規曷副建官之意宜更舊號特立新名庶  
明立制之文咸勵匪躬之節其左右補闕宜改爲左  
右司諫左右拾遺宜改爲左右正言 上欲令諫官  
修其職業故改其官號特降是詔以申明之己亥詔  
免瀛州部民租調三年徭役五年以其再遭犬戎蹂  
躪故也庚子制曰端揆崇資文昌右相蓋非賢而不  
授諒出綽以惟公告示具僚舉茲明命中書侍郎兼



工部尚書臣中書門下平章事李昉嚴廨舊德文學  
名儒踐臺閣之通班素高問望處鈞衡之大任久展  
謨猷謙和秉君子之風純懿擅吉人之美今者輟從  
三事總彼六卿董齊喉舌之官載光北斗領袖搢紳  
之列首冠南宮用資鎮俗之清規式表尊賢之茂典  
禮異適遵於表著睠懷別示於股肱佩服渥恩優游  
名器恭踐厥位往惟欽哉可尚書右僕射同日制曰  
尊賢養老上古格言念舊錄勲前王令典而況再登  
廊廟三東節旄始終不易於純誠出入咸膺於大用

爰時茂德用降徽章山南東道節度襄州管内觀察  
處置等使檢校太師兼侍中許國公趙普大昂儲祥  
維嵩挺秀翊天飛之景運名冠王公蘊台輔之嘉謨  
功書簡冊早從黃閣荐擁高牙隆中盡偃於仁風峴  
首賡歌於善政加以心惟許國道在安民封章屢納  
於忠言致理率陳於正道佑予涼德繫乃宗臣朕所  
以卜在會朝委之論道彝倫未叙將俟於緝熙庶政  
缺然佇期於寅亮是以輟從藩輔復踐巖廊加帝保  
之崇資冠鸞臺之舊列咨上公而詢庶政彌切倚毗

昌洪業以永丕圖更資光輔可守太保兼侍中昭文館大學士又制曰天道無私日月星辰助其照皇王不宰股肱輔弼代其功所以端拱仰成垂衣致理建千年之景運追三代之令猷其有業茂經綸才推謹厚參大政而載罹寒暑秉純誠而無替初終宜推爰立之恩式副至公之選朝散大夫給事中參知政事上柱國賜紫金魚袋呂蒙正四氣均和五行鍾秀蘊濟時之明略輔之以溫恭挺命代之宏材守之以淵默凡膺歷試畢振芳猷公忠推杜稷之臣凝重見廟

堂之器瞻茲大體久鬱具瞻爰資作礪之功用正秉  
鈞之任崇階馭貴列爵增封兼司太史之書載踐地  
官之秩爾宜周旋庶政佐佑眇躬緩茲宵旰之憂翊  
我隆平之運同底於道豈不美歟可光祿大夫中書  
侍郎兼戶部尚書同中書門下平章事監修國史又  
以開封尹陳王元僖進封許王韓王具宗舊名進封襄王  
冀王元份進封越王益王元傑加食邑一千戶武勝  
軍節度使許王錢俶進封鄧王樞密使王顯加檢校  
太傅給事中參知政事辛仲甫加戶部侍郎樞密副

使左諫議大夫趙昌言加工部侍郎以樞密副使左  
諫議大夫王沔爲戶部侍郎參知政事以御史中丞  
張宏爲工部侍郎充樞密副使甲辰詔陞建州爲建  
寧軍節度以武寧軍節度使曹彬加檢校太尉安遠  
軍節度使錢惟濬進封譙國公彰國軍節度使駙馬  
都尉王承衍改貝州刺史永清軍節度使威塞軍節  
度使駙馬都尉石保吉改滄州刺史橫海軍節度使  
殿前都虞候張訓領義軍節度使傅潛領昭化軍  
節度使並充殿前副都指揮使侍衛馬軍都虞候李

繼隆領保順軍節度使充侍衛馬軍都指揮使侍衛  
步軍都虞候戴興領振武軍節度使充侍衛步軍都  
指揮使慎州觀察使駙馬都尉魏咸信為相州刺史  
彰德軍節度使以左衛上將軍張永德為密州刺史  
安化軍節度使乙巳以內客省使楊守一為宣徽北  
院使簽署樞密院事丙午詔郡國民有艱食處聽發  
公廩賑濟之丁未以刑部尚書宋琪為吏部尚書禮  
部侍郎李至為刑部侍郎翰林學士中書舍人宋白  
為禮部侍郎司封郎中知制誥賈黃中為中書舍人

祠部員外郎知制誥蘇易簡為本曹郎中知制誥並  
依前翰林學士以右補闕知制誥李沆為職方員外  
郎王化基為駕部員外郎宋湜為庫部員外郎起居  
舍人知制誥田錫為兵部員外郎知制誥戶部員外  
郎知制誥胡旦為司封員外郎並依前知制誥以左  
神武大將軍順州刺史王繼昇領本州團練使餘文  
武官進秩有差以乙亥散書加恩故也戊申以右諫  
議大夫郭贇雷德驤並為工部侍郎以度支使張選  
為鹽鐵使戶部使魏平為度支使度支副使李惟清

為右諫議大夫戶部使以刑部員外郎陳象輿董儼  
屯田員外郎雷有終並為本曹郎中分充鹽鐵度支  
戶部副使己酉以職方郎中韓丕兵部郎中楊徽之  
並為左諫議大夫司勳郎中羅延吉為右諫議大夫  
以屯田員外郎楊礪為庫部員外郎充襄王府記室  
參軍庾戍以皇子元倓為左衛上將軍元侑為右衛  
上將軍以皇姪孫惟吉為左驍衛大將軍惟正為右  
驍衛大將軍惟叙為左武衛將軍惟和為右武衛將  
軍惟憲為左屯衛將軍惟能為右屯衛將軍壬子興



化軍言甘露降工部侍郎同知京朝官考課雷德驤  
上表求致政先是德驤與趙普不協普再入相制下  
之日德驤方立朝手不覺墜笏遂拜章求退避普之  
讎也因請於便殿見上具陳所以 上勉諭久之  
謂曰第去朕終當保全卿勿以爲慮乃懇乞罷知京  
朝官考課以奉朝請從之仍賜白金三千兩以慰其  
心癸丑以右散騎常侍徐鉉爲左散騎常侍以皇城  
使薊州刺史王延德領本州團練使乙卯右千牛衛  
上將軍李崇矩卒崇矩字守則上黨人也幼孤質長

而謹厚爲鄉里所稱晉天福之亂漢祖起自并汾師  
次上黨史洪肇時爲先鋒軍帥聞崇矩之名召署親  
吏漢祖踐阼以洪肇爲侍衛親軍都指揮使徵巡關  
下洪肇性殘忍好殺軍民橫罹其毒者不可勝計至  
於屠李崧之家皆洪肇蘇逢吉之倂也時人冤之左  
右懼其兇威亦稍稍遁去惟崇矩事之益謹迨洪肇  
被誅卒免其禍周祖初有天下素與洪肇厚善訪求  
親舊將恤其孤得崇矩而悉以委之崇矩嘗主洪肇  
之家籍由是盡獲史氏之財產以付洪肇弟福周祖

聞而嘉之乃命隸於世宗帳下世宗嗣位擢爲供奉  
官是年河東劉崇入寇從征敗崇於高平以功轉供  
備庫副使俄遷作坊使恭帝嗣位以崇矩判四方館  
事 太祖受禪李筠叛上黨率并寇鼓行而南 太  
祖患之命崇矩爲行營護軍率兵戍河陽以禦其衝  
與石守信高懷德羅彥瓌同破筠衆於礮子谷乃表  
請 太祖親征澤潞平以功授右監門衛大將軍充  
三司使累遷至樞密使時趙普爲相崇矩在宥密皆  
數年分秉大柄因以女妻普之子承宗厚相交結

太祖聞之頗怒會門下客鄭伸上書發其陰事開寶  
五年出爲鎮國軍節度使六年追入朝授左衛大將  
軍上即位出爲嶺南道都巡檢使未幾遣使齎詔  
就移爲瓊崖儋萬四州都巡檢使所部兵士憚於從  
行有逗撓之色崇矩乃盡以車服器用金帛凡數百  
萬分給之衆遂感悅樂爲其用累年海上無恙受代  
歸闕遷右千牛衛上將軍尋被病請長告至是卒年  
六十五輟視朝一日詔贈太尉謚曰元靖崇矩性純  
厚寡言而志躬信義好黃白之術尤重佛法以始事

洪肇迨乎通貴見洪肇之子孫必厚禮而優濟之或  
聞有學黃白之道者必自遠邀之至以師禮待之雖  
知其詐而猶以爲神仙之士卒無恨悔在官凡得俸  
入除朝夕伏臘費用外多輸於僧室故身死之日家  
無厚積焉

太宗皇帝實錄卷第四十三

書寫人趙弼

初對王世昌

再對訖創孝廉

太宗皇帝實錄卷第四十四

起端拱元年三月盡六月

三月戊午朔以左監門衛將軍侍其積為本衛大將軍庚申以戶部郎中喬維岳為兩浙轉運使馬步軍都軍頭田斌為冀州防禦使壬戌左神武軍大將軍順州團練使王繼昇卒繼昇冀州阜城人與子昭遠同事上於藩邸性質朴謹愿上頗信任之即位補供奉官累遷軍器庫使會陳洪進獻地泉州賊十餘萬據游洋洞叛命繼昇討平之歸遷左神武將軍領順州刺史知發運使事號為稱職遷本衛大將軍

領團練使至是卒年六十四 上頗嗟悼以舊恩詔  
贈洋州觀察使令中貴人護葬事癸亥許州言行軍  
司馬李惲卒惲字孟深開封陽武人也少力學爲文  
漢乾祐中舉進士及第惲妻父任嵐州合河令惲與  
其妻省之會劉崇拒命僞署州從事擢知制誥翰林  
學士累至司空平章事惲在僞邦頗盡忠所事母任  
氏在鄉里不知存亡居常戚戚不樂但以弈碁飲酒  
爲務政事多廢劉繼元頗以爲言方與僧弈碁繼元  
命近侍直抵惲前取博局焚之惲怡然徐詣繼元謝

繼元又切責之來日別造新局亦棊如故歸朝為殿  
中監始知母亡上表求追服母喪詔不許出知廣州  
改司農卿連知許孟二州以足疾不任朝謁上章求  
解官出為忠武軍司馬至是卒年七十三惲有器度  
善談名理故相王溥薛居正李昉皆與之善重其為  
人溥與昉皆惲同門生也甲子詔曰朕嗣守丕基君  
臨萬國每旁求於俊乂思茂育於黎元然則官脩其  
方而罕聞舉職政失於上而莫之肯言置五諫以何  
施列七臣而焉用是以明發不寐耿耿歎良深宜申誠



勵之文用警搢紳之士應兩省諫官等自今後各思  
砥礪共守箴規政有不便者咸得上言事或乖當者  
悉須陳請儻能中時利病廣朕聰明必當獎乃公忠  
優加爵賞或心非鯁直志在回邪殊無藥石之言但  
蘊脂韋之行如斯巧僞必真嚴刑至於御史臺郎寺  
卿宮尹儼簪裳於著位荷榮寵於公朝是宜振紀律  
於憲臺肅羽儀於會府服勤卿寺陳力春坊共傾許  
國之心副我官人之意咨爾有位咸聽朕言先是臣  
僚上章言事者率多虛誕蓋僥求幸進之心漫以成

風人莫之舉而諫官廢職未嘗聞箴規謇諤之言

上勵精求理思致太平乃責任諫官使極言得失至於有位之士欲令各稱其職故降是詔以申警之己巳以右正言宋沆為京西轉運副使以樞密直學士比部郎中徐休復為左諫議大夫依前樞密直學士甲戌以秘書監錢昱為工部侍郎詔曰朝廷設爵位以待賢能明刑法以馭羣下苟回邪之自露在典憲以宜行樞密副使工部侍郎趙昌言早以微才擢居重任訐謨之效未見於盡忠險詖之蹤頗聞於樹黨

交結非類玷辱清朝比合分首從之元情正刑書之  
顯戮特寬窮究以示包荒俾出佐於藩垣仍不奪於  
章綏噫予之待士豈忘於至公爾之戴君頗乖於誠  
節宜思自咎勿謂無恩可責授崇信軍節度行軍司  
馬仍不得簽署公事同日詔曰爵祿所以育賢能刑  
罰所以正綱紀顧爾回邪之輩玷予明備之朝爰舉  
憲章是為公議鹽鐵副使戶部郎中陳象輿等自膺  
選任累踐清華戴君既乏於盡忠結黨乃通於非類  
險詖無已蹤跡自彰宜並寘於嚴誅用顯懲於多士

特寬窮究以示恩容俾佐郡城頗屈刑典爾宜自省  
法不虛行象輿可責授復州團練副使度支副使刑  
部郎中董儼可責授海州團練副使司封員外郎知  
制誥胡旦可責授坊州團練副使右正言直史館梁  
顥可責授虢州司戶參軍坐昌言之黨也象輿素與  
昌言善董儼胡旦皆昌言同年生顥又常在昌言幕  
下四人皆與昌言厚善日夕多會於昌言之第故京  
師有陳三更董半夜之言先是有倩筆人翟穎者姦  
險誕妄素與胡旦親狎旦知可使乃作大言怪誕之

辭使潁上之初爲潁改名馬周以爲唐馬周復出也  
其言多排毀時政自薦可爲天子大臣力舉十數人  
皆公輔之器令昌言內爲之助人多識其辭氣知旦  
之爲也會京尹陳王使親吏儀賁廉知其事白上  
捕馬周繫獄時張去華爲府判官親窮治之具狀聞  
上怒杖馬周脊黥面流海島禁錮終身昌言等並加  
貶黜先是蘇州人徐半千亦詣闕上書言事上召  
見與語頗奇之因賜名巖叟擢爲陳州戶曹掾巖叟  
請告歸鄉里迎妻子因恐喝州郡恣爲不法事本路

轉運使以聞會馬周之敗 上怒亦令杖嚴叟流海  
島乙亥詔曰鄭州團練使侯莫陳利用身本賤微性  
惟險詖結黨潛誣於良善在官但恣於踰違惡跡滿  
盈醜聲騰沸尚尸榮於列郡實有玷於清朝宜屏姦  
邪用行黜削可除名配商州禁錮利用西蜀人始賣  
藥於都市多變幻之術誑惑閭里時樞密承旨陳從  
信得之以爲方士遂聞於 上即日召見驟加恩遇  
遂歷職外內累至單州刺史鄭州團練使前後賜與  
寵澤莫二恃以左道得幸於 上無復畏憚所爲不

法至於居處服玩皆僭乘輿宮殿之名他亦稱是依  
附者頗獲薦用士君子畏其黨而不復敢言會趙普  
再入中書廉得其狀乃力於上前盡發其事因遣  
近臣就按咸得姦狀故貶竄焉普復上言以爲利用  
罪重責輕未塞天下之望存之何益上不獲已尋  
賜死於商州旣而悔之遂遣使馳傳以免其死使者  
至新安廐置馬踣墜傷趾追不能及利用已磔於市  
聞者快之丁丑火山軍言河西蕃部直蕩族內附已  
卯翰林學士禮部侍郎知貢舉宋白等言準敕放進

士并諸科舉人程宿等一百二十九人癸未 上幸  
玉津園習射賜從官宴飲乙酉黔州言蕃部首領龍  
漢璿乞開道以通中國朝貢從之丙戌少府監言本  
監配役人前太常丞郭冕等九人以會赦上請 上  
曰此輩祇可免其居作而終不可復齒朝行蓋以冕  
等皆賊吏也

夏四月丁亥朔建黎陽縣為通利軍以右神武將軍  
王賓知軍事以右司諫宋泌左正言牛冕並直史館  
己丑制加高麗國王王治靜海軍節度使黎桓並檢



校太尉國子司業孔維上言請禁原蠶以益廩馬

上覽奏嘉稱令付史館辛卯詔曰先是江南兩浙荆  
湖州郡所差京朝官幕職州縣官等咸不得家族行  
如聞中外物情甚鬱今海內寧一願攜家者聽之癸  
巳詔曰朕祇命上玄居尊人上惟思禁暴豈欲加  
兵至如幽薊之民皆吾赤子每聞交鬪盡然傷懷近  
者已許邊疆互相貿易自今沿邊戍兵不得輒恣侵  
掠務令安靜稱朕意焉先是國家累行平伐千里饋  
糧民力疲乏至是上頗有厭兵之意故降是詔甲

午以工部侍郎錢昱知壽州以前軍器庫使趙延俊  
為右班殿直會赦自嶺外放還故有是命庚子以國  
子司業孔維為祭酒乙巳宴近臣於長春殿餞感德  
軍節度使李繼捧之鎮也丙午以監察御史高象先  
為廣南西路轉運使乙酉賜京城耆老九十八人帛  
各五匹庚戌命考功員外郎知雜事呂端起居舍人  
呂祐之使高麗戶部郎中魏庠虞部員外郎李度使  
交州壬子賜光祿寺丞知開封府兵曹事蘇協五品  
服翰林學士易簡之父也 上方寵待易簡故有是命

五月辛酉朔詔置祕閣於崇文院以吏部侍郎李至  
兼祕書監右司諫直史館宋泌兼直祕閣右贊善大  
夫史館檢討杜鎬充校理按六典祕書省中外三閣  
掌典圖書古今文字皆在禁中兩漢或徙金馬門外  
歷代不常厥處唐季亂離中原多故儒雅之風幾將  
墜地故百王之書蕩然散失蘭臺延閣空存名號  
上崇尚儒術屢下明詔賸求羣書四方文籍往往而  
出未數年間已充創於書府矣至是乃於史館建祕  
閣仍選三館書萬餘卷以實其中故以至主之庚午

以東上閤門使安忠護高陽關屯兵辛未詔賜感德  
軍節度使李繼捧姓趙氏名保忠 上以李繼遷頻  
擾邊陲欲委保忠邊事故以五色花牋一幅御書姓  
名以賜之壬申制曰王者鑒丹青之像念公侯必復  
之徼聞鼓鼙之音重將帥專征之寄矧夏臺之興壞  
控朔漠之雄邊甘棠之遺愛尚多飛將之英風未泯  
宜推卅及之典載光節制之權感德軍節度使耀州  
管内觀察處置等使光祿大夫檢校太傅兼御史大  
夫天水郡開國公趙保忠神授韜鈴卅傳忠孝頃者

抗章象魏來獻提封願宿衛於京師尋載移於旄節  
屢遷近鎮益見勤王是用特舉新恩俾臨舊地再委  
邊陲之任慰其夷落之心爾其善繼家聲務綏戎索  
勉樹勲業副我倚毗可特授依前檢校太傅行夏州  
刺史兼御史大夫充定難軍節度夏銀綏宥靜等州  
觀察處置押蕃落等使戊寅賜定難軍節度使趙保  
忠金銀器一萬兩英州言江水漲五丈壞民田及官  
寺數百區庚辰以朔州觀察使左驍衛大將軍趙希  
贊爲秦州刺史先是王師征幽薊也希贊以城降因

授本州觀察使既而棄城來歸

上貸其罪故有是

命辛巳以殿中丞溫仲舒為右正言直史館壬午定  
難軍節度使趙保忠辭之鎮賜襲衣玉帶鞍馬錦綵  
三千匹銀器三千兩別賜錦袍銀帶各五百散馬百匹  
閏五月丙戌朔命許王元僖餞保忠於瓊林苑己丑  
以襄州衙內都虞候趙承煦為六宅使承煦宰相普  
之子也庚寅以左諫議大夫韓丕知孟州辛卯以洛  
州防禦使劉福為高陽關兵馬部署棣州防禦使楊  
贊為貝州兵馬都部署甲午以崇儀使周瑩為西上

閤門使乙未以金部員外郎王幹為荊湖轉運副使  
以前青州錄事參軍麻希夢為工部員外郎致仕希  
夢北海人也梁龍德二年擢明經第累居宰字之任  
素有吏幹凡所踐歷皆有能名以老退居臨淄有美  
田數百頃積貲鉅萬年九十五齒髮不衰 上聞其  
眉壽召至闕下對於便殿而賜金紫因有是命放歸  
別墅踰年而卒希夢居鄉里常兼并不法每持州郡  
吏之長短橫恣營立人皆畏之丙申賜諸道高年一  
百二十七人爵為公士以正月乙亥詔書從事也按

實故戮焉丁巳以左諫議大夫劉蟠同知京朝官考課靜江軍節度使杜審進卒審進真定人昭憲皇太后同母弟也性純質年踰五十不仕太祖受禪徵至闕下授左神武大將軍尋改右羽林大將軍乾德初領賀州刺史知陝州尋授保義軍節度觀察留後五年遷陝州大都督府長史充保義軍節度使太祖幸西洛郊祀審進自鎮來侍祠封國公上嗣位來朝加檢校太尉太平興國五年北征留審進巡警輦轂六年歸鎮九年徵為右衛上將軍未幾領桂



州刺史靜江軍節度使至是卒於京師之私第年七十九 上聞車駕親幸哀慟久之賻贈加等詔親王公主就第哭之輟視朝三日贈中書令謚曰恭惠審進重厚寡言有公侯之體鎮陝郊二十餘年然無尤異之政而勸農新本民頗便之己未 上為審進素服發哀於便殿羣臣詣崇政殿奉慰丙寅忠武軍節度使潘美自三交來朝丁丑以殿中丞夏侯嘉貞為右正言直史館兼直祕閣嘉貞有文學嘗任官岳陽為洞庭賦石散騎常侍徐鉉見之曰木玄虛之流也

其詞彩又過之

上知其名召試禁中稱旨故有是

命復以潭州爲武安軍節度先是建隆中湖南平降

爲防禦使至是以

真宗兼領始命復之是日

上

御政殿試進士諸科舉人得葉齊等一百二十九人

並放及第

上以郡縣闕官甚多先是禮部放榜

上慮有司遺才故命右正言王卬則等於武成王廟

召諸道進士諸科重試得合格者數百人至是上

親試焉甲午詔曰王者設官分職求材任能必若責

其廉隅所宜豐其廩祿今州縣之吏最爲親民俸祿

至微甚無謂也先是除西川廣南外諸道州府幕職  
州縣官俸錢三分中二分給以他物自今以緡錢給  
其半餘以他物充

太宗皇帝實錄卷第四十四

書西人趙鼎

初對王世昌

覆對王世昌

王世昌

太宗皇帝實錄卷第四十五

起端拱元年  
七月盡九月

秋七月乙酉朔以捧日左廂都指揮使范廷召爲齊  
州防禦使右廂都指揮使傅思謨爲鄭州防禦使天  
武左廂都指揮使高瓊爲單州防禦使右廂都指揮  
使王超爲懷州防禦使龍衛右廂都指揮使孔貞爲  
潁州防禦使神衛右廂都指揮使徐興爲衛州防禦  
使馬步軍都軍頭葛霸爲博州團練使彌進超爲磁  
州團練使王漢忠爲賓州團練使康保裔爲淄州團  
練使馬步軍副都軍頭竇暉領播州刺史充許州馬

步軍都指揮使喬清領溪州刺史充陳州馬步軍都  
指揮使牛勣領諒州刺史充襄州馬步軍都指揮使  
辛卯賜衢州烏巨山僧儀晏紫衣時年一百一十四歲  
上聞之徵至闕下舍於相國寺月餘放還山癸巳以  
殿前指揮使左班都虞候麴斌領敘州刺史殿前指  
揮使右班都虞候郭密領富州刺史貞僚左右六直  
都虞候王榮領懿州刺史並充馬步軍都軍頭以馬  
步軍副都軍頭呼延贊領富州刺史散指揮都虞候  
李璘領獎州刺史東西班都虞候時遇領峯州刺史

散貢都虞候張遜領富州刺史並充馬步軍副都軍  
頭甲午以內殿直都虞候楊遠領興州刺史充殿前  
指揮使左班都虞候以散祗候都虞候任斌領愛州  
刺史充殿前指揮使右班都虞候以拱辰下十指揮  
都指揮使李希文領驩州刺史充捧日左第三軍都  
指揮使拱辰上十指揮都指揮使趙鄴領播州刺史  
充捧日右第二軍都指揮使龍衛左第一軍都虞候  
張玘領巖州刺史充捧日右第三軍都虞候散都頭  
都虞候劉用領諒州刺史充馬軍副都軍頭捧日右

第二軍都指揮使劉超領珮州刺史充捧日左第二  
軍都指揮使乙未以天武左第二軍都虞候孫遇領  
勤州刺史充殿前虎翼左第一軍都指揮使天武右  
第二軍都虞候潘超領獎州刺史充虎翼右第一軍  
都指揮使神衛左第三軍都虞候王美領牢州刺史  
充殿前虎翼右第三軍都指揮使神衛右第一軍都  
虞候戴贇領誠州刺史充殿前虎翼右第二軍都指  
揮使天武左第一軍都虞候劉遇領潘州刺史充宣  
武上十都指揮使丙申以金槍直都虞候安習領富

州刺史充拱辰上十都指揮使內貲僚直都虞候張  
斌領巖州刺史充拱辰下十都指揮使天武右第一  
軍都虞候張訓領溪州刺史充宣武下十都指揮使  
馬步軍副都軍頭張鐸領錦州刺史充鄆州馬步軍  
都指揮使神衛左第一軍都虞候常德領溪州刺史  
充御龍弓箭直都虞候戊戌有大星流入羽林光明  
燭地是秋大熱 上以宰相趙普耆年詔許每日長  
春殿對罷便歸私第願養候涼赴中書視事普頓首  
謝丙午詔曰西川編戶繁庶民間食鹽不足自今關



西階文青白鹽峽路并鹽永康崖鹽等勿復禁許商旅貿易入川以濟民食丁未衛尉卿崔仁冀卒仁冀字子遷餘抗人也少篤學有文采事吳越王錢俶累遷至元帥府推官隨俶入朝授淮南節度副使俶又薦仁冀稱才可用擢授衛尉卿判大理寺久之出知宿州踰年移知撫州以疾求代歸闕途至南康軍卒年六十三己酉以蔡州刺史符昭愿知并州均州刺史盧漢贇知平塞軍辛亥以忠武軍節度使潘美知鎮州癸丑以龍衛右第二軍都虞候張玘領巒州刺

史克捧日右第三軍都指揮使

八月乙卯朔司天言壽星見丙辰以亳州防禦使譚  
仁美知寧邊軍六宅使何承矩領潘州刺史丁巳以  
前龍衛都指揮使張思鈞領澄州刺史思鈞先陷幽  
薊累年今逃歸故有是命甲子以宣徽南院使郭守  
文充鎮州路都部署丙寅彰武軍節度使米信來朝  
辛未以河南府法曹參軍梁正辭棣州司法參軍呂  
易從齊州司法參軍李祐之宋州楚丘縣主簿喬蔚  
陳州宛丘縣尉羊道沖並授將作監丞分補中書諸

房堂後吏先是宰相以堂吏缺欲選於百司以補之  
上不許因令吏部選正辭等充焉甲戌月掩建星戊  
寅武勝軍節度使鄧王錢俶薨俶字文德名上一字  
犯宣祖廟諱吳越武肅王鏐之孫文穆王瓘之第  
九子也母吳氏瓘卒其子佐立佐卒弟侁理國事侁  
即俶之兄也晉開運中俶出爲台州刺史下車數月  
有僧德詔謂俶曰此地非君爲藩之所宜速歸不然  
將不利矣俶從其言即求還國是年冬侁爲牙校胡  
思進所廢請俶揔國事漢乾祐初制授東南面兵馬

都元帥鎮海鎮東等軍節度使開府儀同三司檢校  
太師兼中書令杭越等州都督吳越國王三年江南  
僞將查文徽寇福州俶發兵擒文徽獻捷于朝尋授  
尚書令周廣順初授諸道兵馬都元帥顯德元年授  
天下兵馬都元帥四年夏四月杭州火災府寺官舍  
悉爲煨燼將延及倉庾俶命酒祝之曰食爲民命若  
盡焚之民命安仰火遂止國初授天下兵馬大元帥  
是年宣國軍節度使吳延福俶之舅也有異圖左右  
勸俶誅之俶曰吾以先夫人同氣之故安忍置之於

法言訖因嗚咽流涕終全吳氏之族開寶八年朝廷  
舉兵平江表以俶爲昇州東南招撫制置使江南國  
主李煜貽書于俶其略曰今日無我明日豈有君一  
旦明天子易地酬勲王亦大梁一布衣耳俶覽書投  
之地曰以此誘人不亡何待因表其書來上 太祖  
嘉其忠俶遂率前鋒拔常州制授守太師江南平九  
年二月與其子惟濬妻孫氏來朝 太祖遣皇子興  
元尹德昭至睢陽迎勞泊至對見之禮皆從異等館  
于禮賢宅 車駕臨幸尋賜劔履上殿詔不書名封

孫氏爲吳越國王妃是年三月詔遣歸國留其子惟  
濬扈從赴洛陽郊祀上嗣位太平興國二年四月  
來朝因籍其府庫地圖以獻徙封淮海國王以其子  
惟濬爲淮南節度使惟治爲鎮國軍節度使其諸子  
弟姪將佐各分領節制牧守五年夏倣以足疾賜告  
上親臨撫問八年三上表諍元帥從之雍熙元年改  
封漢南國王四年春上以倣抱病俾遂頤養授武  
勝軍節度使改封南陽國王倣拜章固辭國王之號  
因改封許王端拱元年春徙封鄧王會上遣使以

生辰器幣就賜之俶方與使者宴飲罷殆暮有大流星墮于正寢前光燭一庭是夕暴薨年六十俶以天  
成四年八月二十四日生至是年八月二十四日卒  
人皆異之 上聞訃震悼輟視朝七日追封秦國王  
謚曰忠懿命中使監護喪事葬洛陽俶任太師尚書  
令兼中書令四十年爲元帥三十五年窮極富貴福  
履之盛近代無比頗知書能草隸性謙謹未嘗忤物  
然崇信釋氏在錢塘日造寺數百歸朝又以其愛子  
爲僧嘗以病家居有黃門趙海被酒中夜直造俶第

求見俶因出藥一九與之云此藥 上所賜願王爲

海即餌之俶家人皆號泣勸俶勿餌恐藥有毒且疑  
上遣海賜之也俶曰 主上待我厚使者賜藥必良  
藥也又何疑哉因大嚼以卮酒下之海去以其事聞  
上怒捕海繫獄決杖流海島識者許其忠己卯詔曰  
三司吏自今除歲給衣糧外每月前行特支料錢五  
千後行三千食廚料前行二千飯料後行千五百自  
前行已上每年並令吏部流外銓較考至五考無曠  
闕許參選前行注中縣簿尉句押官注望縣簿尉官



滿勒歸司如未願出官者亦聽孔目吏依雍熙四年五月己丑詔書從事右千牛衛上將軍吳處裕卒處裕字恭美許田人也少爲本郡吏漢祖鎮許昌一見器之署爲右職及移鎮太原又以處裕從漢祖即位授引進使轉內客省使隱帝立遷宣徽北院使時李守貞叛河中命周祖爲統率討之以處裕爲行營都監旣班師出爲鄭州防禦使周有天下慕容彥超叛於兗州周祖親討之處裕爲御營使彥超平移授汝州防禦使世宗嗣位入爲右衛大將軍遷右金吾衛

大將軍國初判街仗事

上即位轉右千牛衛上將

軍判金吾如故至是卒年八十八贈太尉處裕性頗  
麤率言多輕肆接物之禮殆缺如也先是同列王彥  
超致政已久處裕常自云處裕縱僇仆於玉陛前  
斷不學王彥超七十便致仕人傳以爲笑每朝會及  
後苑賜宴上憐其壽考多面加撫諭焉庚辰永清  
軍節度使駙馬都尉王承衍橫海軍節度使駙馬都  
尉石保吉彰德軍節度使駙馬都尉魏咸信各赴鎮  
以鄆州觀察使駙馬都尉吳元袞知孟州以右司諫

直史館王仲華爲淮南轉運副使監察御史程文度  
爲河北西路轉運副使 車駕幸太學命博士李覺  
講周易泰卦賜雜綵五十段移幸玉津園習射 上  
中的者五張樂賜從官飲辛巳 上謂宰相曰朕昨  
日聽說泰卦而文理深奧足以爲君臣鑒誠朕與卿  
等道守之趙普等頓首謝以右衛上將軍判右金吾  
街仗宋渥判左金吾街仗事左千牛衛上將軍曹翰  
判右金吾街仗事廣州上言清遠縣公署中有合歡  
樹一株高百餘尺今年三月十日有鳳棲集其上鳳

高六尺下有衆禽隨從樹下生芝草三莖畫圖來獻  
樞密直學士刑部郎中李繼凝卒繼凝故宣徽使處  
耘兄作坊使處疇之子也漢乾祐初天德軍節度使  
郭勲奏爲豐州永豐縣令周顯德中改國子律學博  
士上即位遷四門博士出知房州改太常丞知唐  
州六年拜監察御史未幾充開封府判官改殿中侍  
御史踰年轉刑部員外郎充兩浙轉運使尋知杭州  
召歸闕改刑部郎中充樞密直學士至是卒年五十  
一葬事官給繼凝無文采性頗廉謹所至皆以勤幹

稱屢爲宰相趙普推薦

上於便殿召繼凝與語諭

以將大用之意繼凝心喜旣歸忽中風眩是夕卒

九月乙酉朔以冀州防禦使田紹斌爲解州防禦使  
以侍衛馬軍都指揮使李繼隆爲定州兵馬都部署  
宣徽北院使簽署樞密院事楊守一卒守一故上  
晉卽消人卽位自供奉官遷翰林副使初名守素至  
是賜名守一與趙鎔柴禹錫相里勲等告秦王廷美  
陰謀不道等事擢爲東上閤門使判四方館事內客  
省使並兼樞密都承旨遷宣徽北院檢同知樞密院

事至是卒贈忠武軍節度使葬事官給丙申以起居  
郎夏侯嶠爲襄王府翊善庚子以懷州防禦使王超  
領誠州刺史澤州團練使王昭遠領勤州防禦使並  
充殿前都虞候左千牛衛大將軍鄭彥華卒彥華福  
州長樂人也少有膂力本道節度使李達以隸帳下  
補勇勝軍都指揮使與留從効陳洪進董思安張漢  
思戍臨汀一日馳獵彥華獨射殺乳虎於寧化山中  
從効等皆服由是知名江南遣大將王崇文等率師  
七萬攻圍福州崇文卒李興登城詬罵李達達不勝

其情募生得興者彥華請行夜縋出城外壕中伏岸  
傍興嫚罵如初彥華操長鈎鈎而拉之皆墜水中城  
上引縋與興俱縋而入萬衆鼓譟達得興而甘心焉  
會崇文食盡引軍退彥華益以拳勇聞於郡中歲餘  
劔州刺史陳誨治水軍數萬攻圍達會積兩江漲誨  
沿流七百里一夕至城下彥華將兵屯候官自度力  
屈以所部降誨誨與語大奇之留署軍小校時江南  
李景以淮右用兵不利遣禮部尚書潘承祐使福建  
募驍果以備濠泗承祐以林仁肇及陳誨子德成暨

彥華應詔後皆至節鎮彥華率兵與周師相持淮上  
大小百餘戰身被五十餘創累遷至節度使同平章  
事王師征金陵旣自採石渡江李煜遣彥華督水軍  
萬人又遣別將杜真率步軍萬人逆戰誠之曰水陸  
兩軍相爲表裏則師克濟矣旣行真乃率兵先往彥  
華擁兵不救真於是敗散自是城中喪氣閉壘不議  
戰矣江南平授左千牛衛將軍 上親征河東以彥  
華爲京城左廂廵檢從曹彬北征以彥華督糧運累  
遷至左屯衛將軍改左千牛衛大將軍至是卒年七



十三丁未吏部侍郎兼祕書監李至上言著作局撰  
告饗宗廟及諸祠祭祝文稱尊號唐室已來惟開  
元禮有之稽古者以爲非禮且尊號起於近代請舉  
舊典饗宗廟稱嗣皇帝且某諸祠祭稱皇帝  
斯爲得禮從之主客郎中和峴卒和峴字晦仁周右  
僕射凝之子也以門蔭七歲爲左千牛備身十六爲  
著作郎國初授太常博士從祀南郊峴贊導乘輿  
進退閑雅太祖謂近侍曰誰氏之子何相禮之明  
辨乎左右即以峴門閤對尋拜刑部員外郎兼判太

常寺先是王朴實儼考正雅樂有所未備者峴繼而  
成之遷司勳貢外郎判吏部南曹出爲夔晉二州通  
判上即位遷主客郎中知兗州改京東轉運使峴  
性苛刻鄙吝好殖財貨復輕侮人嘗以官船載私貨  
販易規利爲彰信軍節度使劉遇所發坐削籍配隸  
汝州禁錮未幾起爲太常丞分司西京踰年復授主  
客郎中判太常寺兼禮院事至是卒年五十六

---

書寫人張仲

初對王世昌

再覆對訖  
刺

---